



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym

tiryimym@aolima

tir yimym

TAPAK 6

Russia Tir Putin-i
Kyrgyzstan semdang

CM Himanta amokmerena Kamrup
nung poster kar maloktsü

VOL. XXI NO. 06 (ADOK 06) DIMAPUR ROGONÜ (FRIDAY) MONGPUTENI (OCTOBER) 13, 2023 ₹ 5.00

Nagaland nung mapa bushir nisung 70,218 lir

Dimapur, Mongputeni/Oct. 12 (TYO): State nung zünger mapa mangu aliba lanurtem asoshi tebilemtsü tulu lir, ta Principal, Industrial Training Institute, Mokokchung, Imlisunep-i ashi. Brehostibarnü District Employment Exchange ajanga ayongzükba Outreach Program on career talk sentong nung jembidang, state nung June 2023 tashinung zünger mapa bushir lanur 70,000 dak tema lir, ta pai ashi.

dang pei career shimba mapang kanga shisadanga shimtsü ayongzükba liasü.

Model Career Centre, Mokokchung nungi Yapang Jamir-i kasa sentong nung jembidang national career services ajanga service balala agütsüba indang lemsatep aser ITI courses tem renemba sülen dangar talenba kübok mesüi takum nung takok ngua alitsü kaketshir nem maongka agütsüba indang jembia liasü.

Anungji pai kaketshirtem

October 14 nü Mokokchung district nung power line shibangtsü

Dimapur, Mongputeni/Oct. 12 (TYO): Mokokchung District nung October 14, 2023 anepdang 9:00 ako nungi nikongdang 2:00 ako tashi power shibangtsü, ta Mokokchung Electrical Sub-Division kübok Power Department ajanga sangdong ka nung metetdaksü.

tali ainba ajanga power lines nung kongshia nüburtem nem electricity agütsüba nung timtem ajuruba mechi arem jidoktsü asoshi iba mera ya agir.

Iba amala arem aser süngdonglidong ajanga power supply nung kongshiba agi nüburtem nem timtem agütsür aser power sub-station nung aliba osettsüset nunga kongshir, ta Er Achanger Aier, SDO, Mokokchung Electrical Sub-Division ajanga sangdong ka nung ashi.

Teti inyakba ama district telungzük nung power line anasa arem mürektettsü mechi khen asoshi iba mera ya agütsü, ta ashi. Süngdong-lidong aser arem

Yimdak-yimtsüng nung bank accounts lapoktsü sorkar nungi temelaba bushir

Kohima, Mongputeni/Oct. 12 (TYO): State nung bank temi yimdak-yimtsüng tonga motetba mapang ka nung Department of Posts (DoP) ajanga state tesem ajungalen aliba branch offices 357 nung account lapoktsü melang ta Nagaland sorkar dang tanü ayongzükba liasü.

IPPB ya amshitettsü, ta Som Kamei-i ashi.

Yimdak-yimtsüngtem nung postal service agütsüba nung menuba ajemtsü asoshi Postal Department-i mera kar agir, ta pai ashi.

Department ajanga service tasen, Dak Ghar Niryat Kendra (DNK) agütsüba indang jembidang, paper works tajemba nung bendanglen nungi osettsüset bener arur asoshi sapang agütsütsü nükjidong nung iba service ya agütsür aser yangi physical documentation menüngdak, ta pai ashi.

Ibai Customs department den DoP lungjemer agütsüba service ka lir, anungji entrepreneurs temi iba service agütsü akok, ta ashi.

Nagaland nung DNKs pongu lir aser itemji Kohima Head Post Office, Dimapur Sub Post Office, Mokokchung Sub Post Office, Jalukie Sub Post Office aser Phek Sub Post Office alitsü, itemji ajanga Nagaland nung adokba osettsüset aser chiyongtsü danga leni yoktettsü, ta ktdangsür kati ashi.

National Postal Week nung shilem ka ama DoP Nagaland ajanga Cimorb Hotel, Kohima nung customer meet sentong ka ayongzükba nung jembidang iba tayongzükba o ya Postmaster General NE-II Region, Som Kamei-i ashi.

Tang Department of Posts, Nagaland ya India Post Payments Banks (IPPB) den branch offices 357 lir, aser yimdak yimtsüng nung alirtem asoshi account lapoktsü state sorkari temelaba agütsüra ibaji ajanga sorkar scheme balala nungi yimdaklirtem DBT teyari anguba nung yaritsü, ta pai ashi.

Aadhaar den bank accounts sendakteptsü nüngdaka aliba MGNREGA, Old Age Pension, Kisan Samman amala central scheme asoshi yimdaklir atema

Kohima nung HIV+ve menatepa aoba tebilemtsü lemsatep

Kohima, Mongputeni/Oct. 12 (TYO): HIV+ve tashidak menatepa aoba shilem 96.27 shi nung medemba ajanga lir ta District AIDS Prevention and Control Unit (DAPCU) Kohima ajanga agütsüba data nung shia aliba tebilemtsü ya tulu lir, ta Deputy Commissioner & Chairperson District TB Forum, Shanavas C, IAS-i ashi.

sendaktepa aliba department temi kanga junga lungjemer inyaktsüla, aser awareness tali agütsütsüla, ta Shanavas-i ashi.

District administration sasep nunga nüngdakba teyari ajak agütsütsü, ta pai ashi aser nükjidong atongtsü asoshi sentong balala agiba nung tali temolung agütsütsü ajungshia liasü.

Kohima district nung HIV+ve aliba tensa asadanga lemsatepba mapang, general clients 8,769 aser ANC clients 2,144 tashi Kohima aser Tseminyu nung aliba Stand Alone ICTCs aser Kohima district nung aliba Mobile ICTC ka nung tendanga liasü, ta Sentimongla Tzudir, DPO

Deputy Commissioner, Kohima indang Conference Hall nung October 11, 2023 nü Kohima District TB Forum - DAPCU - EVTHS senden amendang, arishi küm 15 nungi tenzükba HIV+ve menatepa aoba ya tebilemtsü tulu lir, anungji

Nagaland tang tashi central sorkar dak metaloka lir: Advisor Khamo



Department of Economics, Nagaland University aser Nagaland Economic Association lungjemer Nagaland University, Lumami nung October 12, 2023 nü 'International Conference on Rethinking Economic Development in India: Sustainability, livelihood, and efficiency' sentong ayongzükba agidang ketdangsürtemi iba mungdang indang souvenir sayatsüba noksa nung angur.

Kohima, Mongputeni/Oct. 12 (TYO): Tanü Advisor, CAWD & Taxes, Kudecho Khamo-i tashi-temeter aser kaketshirtem dang lokti nung temelenshi tajung alitsü asoshi bilema inyaktsü ajungshia liasü.

Nagaland University, Lumami nung ananü 'International Conference on Rethinking Economic Development in India: Sustainability, livelihood, and efficiency' sentong tenzükba mapang jembidang pai iba o ya shia liasü.

Iba sentong ya Department of Economics, Nagaland University ajanga Nagaland Economic Association (NEA) den lungjemer ayongzükba lir.

Shisatsü aser shisadanga tashi ya tulu lir, shisatsü aliba ya tashi tulu lir aser shisadangtsü akokba ya tongtipa lir, ta Khamo-i ashi.

Rongsenketzüng asoshi terenlok lenmang tejangja adokdaksütsü asoshi academia, researcher aser teshisadanger temi asen ket nung aliba rongsen asadangtsü kanga tongtipang lir, ta pai ashi.

Research agia masadangi sentong yangluba nung rongsenketzüng tsütsü timtem ajurutsü, anungji terenlok asoshi mangdang/nükla tejangja nüngdaker.

Pai state nung rongsenketzüng aser terenlok tsütsü tawa aliba aser mapa manguba tebilemtsü benoka jembidang, lanurtem rongnung entrepreneurship adokdaksütsü nüngdaker, ta ashi.

Nagaland nung nübu aser ali rongsen lir, saka rongsenketzüng tsütsü central sorkar dak metaloka lir, ta Khamo-i ashi.

State nung tang aliba educational system ajanga mapa bushir adokdaksür saka mapa agütsür madoker, aser tang tashi taka-taiter densema aikati takum alitsü aser takok angutsü asoshi sorkar mapa ya dang lenmang lir ta angateter, ta pai sasa bilemba lemsatep.

Pai economic scholars aser kaketshirtem dang rongsenketzüng tsütsü terenlok asoshi tasü ita shisatsü teladak nung pei sasa pei dak tamang kaa alitsü ajungshia liasü.

Advisor Khamo-i lanurtem dang state terenlok asoshi rongsen, shilem tajung agir aser teinyaker ka-ka asütsü ayongzük aser Nagaland ya mozü mamshi alu nungi chiyongtsü züsentetba aser tourism tesep ka kumtettsü, ta ashi.

Iba sentong nung Advisor Kudecho Khamo-i mungdang indang souvenir sayatsü.

ICFAI University indang vice-

chancellor, Prof. Saundarjya Borbora-i iba mungdang ayongzükba nükjidong rateta ashiba mapang alima nung pei sasa pei peria aser ajak densema rongsenketzüng adokdaksütsü rongdak-nüngdaka kumogo, ta ashi.

Vice-chancellor in-charge aser Dean of Social Sciences, Nagaland University, Prof. M.K Sinha-ia lipajen, rongsenketzüng aser jenjang kanga junga ketdangsüba ajanga terenlok alitsü, ta ashi.

Department of Economics, Nagaland University indang HoD aser NEA tir Prof B Kilangla Jamir-i jembidang economists, researchers, policy makers, academics, scholars aser kaketshirtem shisatsü lemsateptsü asoshi NEA ajanga sapang agütsüba indang osang agütsü liasü.

Iba mungdang ya ajanga state aser linük indang rongsenketzüng nung terenlok alitsü imlar, ta lai ashi.

Iba sentong ya Associate Professor, Department of Economics, Nagaland aser NEA kimen Dr Renbeni Kikon lenisüba kübok agi aser Professor, Department of Economics, NU aser General Secretary, NEA, Zarenthung Ezung ajanga melepzüng o jembia liasü.

DAPCU ajanga matetdaksü.

General clients 8,769 nungi client 214 dak HIV+ve putet aser item rongnung tebur 119 aser tetsür 95 liasü aser parnok 164 Kohima district nungi lir, aser ANC clients 2,144 nungi client 27 dak HIV+ve putet aser parnok ajak Kohima district nungi lir, ta ashi.

General client aser ANC client 241 dak HIV+ve putetba nungi shilem 43.57 ya arishi küm 25-34 tsüngta, shilem 28.63 ya arishi küm 35-49 tsüngta, arishi küm 15-24 tsüngta shilem 19.5, arishi küm 50 nungi tema shilem 4.95 aser arishi küm 1-14 tsüngta shilem 3.32 lir aser tashidak menatepba shilem 96.27 shi nung

medemba ajanga lir.

ISHTH Campaign dak sendakba nung jembidang, ita ka atema ISHTH Campaign ya July 20, 2023 nü District Jail, Kohima nung tenzükba liasü, ta lai ashi.

Iba campaign mapang client 93 tashi HIV aser Syphilis, TB, Hep B aser Hep C atema temang tendanga liasü, ta Sentimongla Tzudir-i ashi.

TB dak sendakba inyakim balala indang lemsatepba mapang, TB asoshi nisung 1,353 dak tendanga nungi nisung 403 dak TB putet aser item rongnung nisung 363 treatment tagidak lir aser tanüngba nisungtem maru, ta Dr. Chibenthung Kithan DTO

Kohima ajanga ashi.

Paisa NIKSHAY MITRA (Donor) indang lemsatep, koba TB agi shiranger nem chiyongtsü agütsüba indang lir, aser tang TB agi menepa alir nisung 114 nem chiyongtsü agütsütsü nisung 39-i molungogo, ta ashi.

TB agi shirangertem yaritsü asoshi lokti tentet, arogo aser kija nungi tetenlar tali nüngdaker, ta pai ashi.

Vituzolie Kuotsu DIS DAPCU ajanga Elimination of Vertical Transmission of HIV & Syphilis indang presentation agütsü aser Imliakum Imsong PO, AHANA ajanga AHANA indang lemsatepa liasü.

Forest colony Kohima Middle School, High School jenjangi ajungketogo



Sentong nung shilem agirtem aser ketdangsürtem tangokba noksa nung angur.

Dimapur, Mongputeni/October 12 (TYO): Commissioner and Secretary, School Education, Kevileno Angami-i October 11 nü Forest colony Kohima, Government High School lapoktsüogo.

Alakteta jaoker ama sentong nung o jembiba mapang lai, nükjidong takok ngua inyaksü atema ajak longjemer inyadaksüba asoshi Tsüngrem nem tenüngsang agütsü. Laisa, colony nung stakeholder tem ajak aser iba school middle school nungi high school jenjangi ajungketba nung sedaka alir ajak nem tenüngsang agüja liasü.

Laisa, jenjang aketba mapa aser shisaliok agütsü atema

state sorkari Government school 1932 amenoka lir, ajisüaka tetsükdaksü balala aliba ajanga iba nükjidong mataloki lir, ta ashi.

Maneni lai, kong lokti-i yakyaka shilem agir iba tesem nung sorkar school tema nija school tem den meneptepa ainba angur ta shia, nüburtem dang iba school pei meyong ama agizüksü mepeshiba den tesayurtem dang shisaliok jenjang tajungba kümdaksütsü asoshi tali bendanga agütsüshir inyaksü ajungshia liasü.

Kevileno-i ashiba agi, India sorkari School Education agütsüba nung lokti-i shilem agiba tajangzük asatetogo aser iba dak ajemdaker Nagaland

sorkari 2002 küm public services communitize sütsüogo, kong elementary school education ya lokti-i nongita yaritsü aser lokti-isa school nung sorkar tenzükertertem aser parnok itasen lemshiba ajak achaayangtsü.

Lai, Forest colony GHS kanga renlokogo aser lokti-i nübu aser rongsen agi school nongita yariba ajanga temeket nung alirtem ajungmesor, ta ashiba den nüburtem aser talisa tekübokba jenjang nung aliba nüburtem tenüngdakba peritsütsü atema iba school high school jenjangi ajungketba nung sendaka alir ajak dang kanga pelaba lemsatempa liasü.

DIPR-i ayongzuka capacity building training agütsüdar

Dimapur, Mongputeni/October 12 (TYO): Directorate of Information & Public Relations-i ayongzuka IPR Conference Hall, Kohima nung service rules, account matters aser photography dak sendakba nung building training ka agütsüdar.

Anogo ana agitsü aliba training sentong ya October 12 nü tenzük aser October 13 nü tembangtsü.

Department inyakyim tedangshiba akümtsü atema ministerial staff aser field staff tem nem tawa tanü

inyakyimtem indang tajungba angazükdaksütsü nükjidong nung iba training sentong ya ayongzükogo.

Mezüngbuba anogo training nung shilem agirtem rongnung district office ajak nungi department indang ministerial staff tem densema liasü aser shisalen agütsürtemi parnok nem office procedure tem, service books, account ken o, pension ken o aser e-pay bill system indang tangazükba agüja liasü.

Anogo ana training sentong atema shisalen agütsürtem ya

timba Directorate indang staff tejentem lir. Item staff tem ya kümtem tsüngda tajangshiba aika ngur alirtem aser tawa sorkar inyakyimtem indang kanga junga jangjar alirtem lir.

Training tanabuba anogo ya department indang photographer tem atema asütsü aser iba ya trainees tem atema refresher photography course ka asütsü. Training mapang trainees tem nem latest equipment amshitsü atema tangazükba agütsütsü aser iba den parnok tasa arangtetsütsü asoshi tangazükba agütsütsü.

Pungro nung Krishi Mahotsav sentong ayongzuka agiogo



Dimapur, Mongputeni/October 12 (TYO): Sub Divisional Agri Officer (SDAO), Pungro Sub Division tawabangba kübok Block Khongsa aspirational atema October 6 nü SDAO Office, Pungro nung Sankalp Saptah indang Krishi Mahotsav (Agriculture) sentong ayongzuka katsüogo. Iba sentong nung aluyimer 60 dak temai shilem agia

liasü. SDAO Pungro, Rokhwetsholo Kapfo-i sagdong ka ajanga ashiba agi, iba sentong nung shisalen sayurji Agriculture Inspector Yamuki, aser AFA Dethong na liasü.

Onük dak ajemdaker jembiba mapang shisalen agütsürtemi jenjang menjang ayimba yimya aser PMKISAN inyakyim indang metetdakja liasü. Sentong

nung department inyakyim balala aser IPM inyakyimtem indang sentong nung shilem agirtem nem shisalen agütsüri tangazükba agüja liasü.

Temetetsü kaji PMKISAN beneficiaries-i ajangshiba tetsükdaksütem department-i angaoka ayu aser parnok tebilemtsütem takaratiba nung bentetsütsü tenangzükba agüja liasü.

NBSE-i tatidang indang osang agütsü

Dimapur, Mongputeni/October 12 (TYO): NBSE-i sangdong ka ajanga, Repeaters aser Compartmental tatidang agütsütsü purtem shirnok HSLC aser HSSLC 2024 atema form fill up mesüet parnok nem ano maongka ka agütsüogo aser form ya October 16 nungi 21, 2023

tashi fill up sütettsü ta metetdaksüogo. NBSE-isa, iba ya tatembangbuba maongka asütsü ta metetdaksü. Maneni Class XI atema question paper taa agütsütsü asoshi portal ya October 16 nungi 21 tashi lapoktsütsü ta metetdaksüogo.

Kohima Police-i rakzükkrakdemer ka apu



Dimapur, Mongputeni/October 12 (TYO): Kohima jila nung shishilembartem dang nungi sen meshia aoba osang kanga angazükba sülen SDPO (North) Kohima aser local temi anir Kohima Police kübok North PS, Mobile Unit, District Anti Extortion Team aser IRB nungi sepaitemi October 11 nü meita aoba sentong ka ayongzuka agi aser NSCN (Khango) züngsem Vilhou pua liasü.

Iba dak sendakba nung North PS nung ken o ka benokogo aser bushisüngdang tenzükgogo.

Satsu Sub-centre Oct 12 nü semzükogo



Mongputeni/October 12 (TYO): October 12 nü Chief Medical Officer Mokokchung Dr. Kibangkumba-i, Mokokchung district kübok Satsu yimtsüng nung Sub-Centre semzüktsüogo.

Satsu yimtsüng Community hall nung sentong tatsüka agiba mapang Satsu Village Council Chairman-i, yimtsüng koda 2014 küm recognize süa liasü aser 2018 küm Sub-Centre lapoktsü atema benoka construction committee tentetba nungi iba centre lapokba anogo tashi koda inyakyonga aru iba indang metetdaksü. Paisa, iba centre takok ngua amenokba dak sendaka alir ajak dang kanga pelaba lemsatempa liasü.

Sentong nung alakteta jaoker Chief Medical Officer Mokokchung, Dr. Kibangkumba-i o tatsüka jembiba mapang Advisor, Information and public relations and Soil & Water conservation, Imkong L Imchen dang kanga pelaba lemsatempa liasü, shibai Satsu yimtsüng amenokba aser yimtsüng nung

Sub-Centre ki tasen amenoktsü atema teyari tulu agüja liasü.

Paisa, Village Council, Village Health Committee züngsemtem aser yimdaklirtem dang yakyaka shilem agitsü aser takokba tashi Sub-Centre aser staff tem nongita yaritsü mepeshia liasü, ajita asünungdang iba centre ya mapang shidak nung anepalutetsü aser tarutsü nung temaba jenjangi ajungkettsü atema lenmang lapoktsü, ta ashi.

Maneni pai, mapang shidak nung immunize asütsü, mashisa aliba tetsütem mapang shidak nung Ante Natal Care agitsü asoshi tangazükba agütsüba den tashidak balala matongdang nokdangbaji ajak dang tajungtiba ta shia tashidak balala nungi jenboa alitsü atema kechi jenjang agitsü tim, item indang metetdakja liasü.

Sub Centre lapokba sentong nung Aliba, Kinunger aser Mangmetong Village council, Mangmetong Senso, Mokokchung Town nungi lenirtemi shilem agia liasü.

AR-i Hazadisha nung Handicrafts Bazar shed lapoktsü

Dimapur, Mongputeni/October 12 (TYO): Assam Rifles-i, October 11 nü Doyapur anasa Hazadisha yimtsüng nung Handicrafts Bazar Shed semzüktsüogo. Iba project ya Assam Rifles Civic Action Programme nung shilem ka ama Assam Rifles-i tembanga inyaksüogo.

Iba shed ya Hazadisha yimtsüng GB aser Chairman nati, Dhansaripar Sub Division kübok Chairmen ajak, lanur kaketshirtem, 'Hazadisha nung

alirtem aser Dimasa aser Sema yimtsüngtem nungi nüburtem matsüngdang semzükja liasü.

Hazadisa yimtsüng head GB Jeevan aser Chairman Mr R Langthasa nati iba mapang tajung asoshi AR dang kanga pelaba lemsatempa liasü.

Assam Rifles-i kinük nung aliba yimtsüngtem nung terenlok maparen balala aika inyakja arudar. Oct 11 nü iba sentong nung tanur aser tetsürtem densema nisung 400 dak temai shilem agia liasü.



October 12, 2023 nü France yimtiba, Paris nung Indian Defence Minister Rajnath Singh aser France Minister of Armed Forces, Sebastien Lecornu na leniba nung 5buba Annual Defence senden amendang tangokba noksa nung angur.

India-i sensotem anir arutsü atema 'Operation Ajay' tenzükogo

New Delhi, Mongputeni/October 12 (Agencies): Israel aser Palestine na tsüingda rara tesashiba akümba mapang nung India-i sensotem linüki anir arutsü atema Operation Ajay tenzükogo.

Alima tesem balala nung raraba mapang, wara mapang aser tzi-mopung dak sendakba lendong tulu aliba mapang nung India-i sensotem anir arutsü atema operaion balala tenzöker.

Israel nung aliba Indian Embassy-i operation Ajay maparen mezüing tenzükamezüngbuba tayimtsü ajanga anir aotsü India nungertem tenüing email süogo aser Hokolbarnü mezüngbuba

tayimtsü nung Israel nungi India nunger 230 tonga anir arutsü.

Israel Consulate General in Midwest India, Kobbi Shoshani-i India-i 'Operation Ajay' tenzükba atema Ato kilonser Narendra Modi-i aniba sorkar nem tenüingsang agütsü.

Operation Ajay kübok Israel nung aliba India nunger 18,000 shi anir arutsü.

Israel Consulate General-isa, Operation Ajay takok angutsü atema Israel sorkari Tel Aviv nung aliba Indian Embassy den amalitepa inyaktsü, ta metetdaksüogo.

Paisa, Ato kilonser Narendra Modi ama lenirtemi Israel pusema ola adokba ajanga tang ama tensa ka nung Israel tashi

itdaksür; tang ama tensa nung iba ya kanga tongtibang, ta ashi.

Taoba Honibarnep Hamas teloki rocket meyirjang aika amshia Israel amakba sülen Israel Air Force-i anünglen nungi Gaza Strip amaker; talisa Hamas commando force aser parnok indang headquarters amaker. Israel air force-i Hamas navy nung tongti ketdangser Muhammad Abu Shamla tepsetba den külemi par kidang rizünga aliba raraba hadir ajak samatsüogo.

Israel-i Hamas kiralongrar telok meshimeshia samatsütsü nükjidong yur Gaza amaker; kobi melii Israel sepaitemi Gaza Strip telungi ia amaktsü renemdar.

India nung ayongzükba G20 senden nung Canada Speaker madentsü

New Delhi, October 12 (Agencies): Tan hopta India nung ayongzükba G20 Speaker tem senden nung Canada Senate nung speaker madentsü.

India aser Canada na tsüingda tesendaktep raksar lia India nung ayongzükba G20 senden nung Canada nungi ketdangser iba senden nung madentsü osang jangjar.

Bodhbarnü Raymonde Gagne indang office nung otongdar kati, Hokolbar nungi tenzükba anogo ananü Parliamentary speakers' senden nungji la (Gagne) madentsü, ta metetdaksü.

India nunger ketdangser anatia, Parliamentary Speakers senden nungji Gagne madentsü, ajisüaka la iba senden nung medentettsüa akümba kuliji parnok memetdaksü, ta

shio.

Taoba hopta osangbenertem den jembidang Lok Sabha Speaker, Om Birla-ibo, iba senden nung adentsü Gagne-i melungogo, ta metetdakja liasü.

La iba senden nung medentetyonga Canada-i la melen ketdangser kar yoktsü asü meyoktsüar mejangja, kechiyong Speaker's office ajanga telangzüba kecha magütsü.

New Delhi nung ayongzükba G20 züingsem linüktem nungi Parliament Speaker tem senden nungji linük 25 nungi presiding officers aser G20 züingsem linüktem nungi deputy speakers 10 den tejaoker linüktem nungi ketdangsertem adentsü.

Anogo asemnü senden nungji tejaoker 350 dak tema

adentsü imlar. Iba senden nung Parliament züingsem 50, general secretaries 14, vice-presidents 26, International Parliamentary Union president aser Pan-African Parliament President-a adentsü.

Iba senden ya October 12 nungi October 14 tashi India International Convention & Expo Centre (Yashobhoomi) nung amentsü. October 13 nü Ato kilonser, Narendra Modi-i G20 Parliamentary Speakers' Summit (P20) sendenji tenzüksütsü.

Tawa Canada Ato kilonser, Justin Trudeau-i, Canada nung Khalistani lenir, Hardeep Singh Nijjar tepsetba nung India sorkari shilem agia alitsüa akok, ta yimjak nung tai tongloktsüba sülen linük ana tsüingda tesendaktep mejungi kümogo.

NCP MP, Supriya Sule-i party ajak senden amentsü akhanger

New Delhi, Mongputeni/October 12 (Agencies): Sharad Pawar-i aniba Nationalist Congress Party nung working president aser party MP, Supriya Sule-i, Israel-Palestine tsüingda mangatettep dak sendakba nung India tangatetba atema o lemteptsü asoshi Centre sorkari party ajak senden ka ayongzüksüla, ta metetdaksü.

Brihostibarnü Pune nung osangbenertem den jembidang Sule-i, Israel pusemba ajanga Narendra Modi-i aniba sorkari lenmang balaka shimogo, ta ashi.

Taoba Honibarnü Hamas teloki Israel amakba sülen Israel o Palestine na tsüingda raraba mapang nung India sorkari

Israel pusemer saka Congress-ibo Palestine nunger temeden atema jembir.

Iba dak sendakba tasüingdangba ka langzüdang Sule-i, Israel-Palestine rara dak sendakba nung tang tashi India tangatetba kasa dang, ta ashi.

Lai, "Ato kilonser ka ama Atal Bihari Vajpayee aser Indira Gandhi nunger tangatetba kasa dang liasü. Iba onük nung teti agia India tangatetba kasa dang liasü, ajisüaka tang Centre sorkari tanga lenmang balaka shimmer. External affairs dak sendakba onük adokba mapang nung party ajak senden ayongzükamezüngbuba amentsüla," ta ashi.

"Tang alima nung rara lir, anungji party ajak senden ka

ayongzüksü nüngdak mesüra linük nung lenir tain ajak den o lemtep akatsü nüngdak," ta lai ashi. "Ni Ato kilonser Narendra Modi dang tang rongdak süa party ajak senden ka ayongzüksü atema mepishiner," ta laisa shisem.

Hombarnü Congress Working Committee (CWC)-i tamalen tangatetba kasa lephsia, Palestine nunger ali alitsü temeden onok pusemer, parnok nija sorkar temeden alitsüla aser taküm akhümketa alitsü temeden pusemer, ta metetdakja liasü.

CWC-isa tangsa rara anentsü aser mangatettep ken o ajak bentettsü atema ken o jemb tenzüksü ayongzükogo.

Mulungnen



Ozüi amadoktsü makokba temeim jabaso, **Imnayachet Mollier** anojungi ajungbena akümüli nungi pilar onok mangyim jashi aser mulungzürep tia nung alidang kija kibong, arogo aser lokti tentetem aser temeimertem shirnokisa ozü dang meima nübo, rongsen aser sarasadem den temeim aser tesünep o tajung agi onok mulung anisüngzükja yaritepogo, nenok ajak dang onok bang agi meshitetba tepela lemsateper.

Ano, talisa item teyariteperitem kija, kibong, arogo aser loktitem dang tenüngteta pelaba shisemer :

1. Shri. Sharingain Longkumer, Speaker, Nagaland Legislative Assembly.
2. Shri. Temjen Imna Along Minister, Tourism & Higher Education, Govt. of Nagaland.
3. Shri. Tongpang Ozukum, Advisor, Govt. Of Nagaland.
4. Shri. Temjenmenba, MLA & Advisor, Govt. Of Nagaland
5. Shri. Moatoshi Longkumer, Advisor, Govt. Of Nagaland.
6. Ao Senden.
7. Watsü Mungdang
8. Ao Kaketshir Mungdang (AKM)
9. Western Chakhesang Hoho
10. Naga Students' Federation (NSF)
11. All Nagaland College Students' Union (ANCSU)
12. Ongpangkong Kaketshir Mungdang
13. Asetkong Kaketshir Telongjem Mungdang
14. Jangpetkong Students' Conference
15. Langpangkong Kaketshir Mungdang
16. Japukong Kaketshir Mungdang
17. Tsürangkong Kaketshir Mungdang
18. Jangpetkong Senso Mungdang
19. Mongchen Students' Union, Mongchen
20. Mangmetong Kaketshir Telongjem
21. Akhoya Students' Union
22. Longjang Kaketshir Telongjem
23. Longkhum Students' Union
24. Foothill Ao Lanur Telongjem
25. Dimapur Ao Lanur Telongjem
26. Ao Kaketshir Telongjem, Kohima
27. Ao Senso Telongjem Dimapur
28. Ao Students' Union Dimapur
29. Dimapur Naga Students' Union
30. Mongchen Senso Telongjem Dimapur
31. Ao Youth Forum, Diphupar
32. Chümoukedima Ao Lanur Telongjem
33. Chümoukedima Watsü Telen
34. Kughato Village Council
35. Kughato Village Baptist Akukuhou
36. Akhoya Baptist Arogo
37. Kuhuboto Area Aoer Telongjem
38. Kuhuboto Town Temeket Aoer Telongjem Fellowship
39. Salt Christian College
40. Alumni Association, Salt Christian College
41. CMHSS, Impur
42. Akhoya Senso Telongjem Dimapur
43. Akhoyatsür Telongjem Dimapur
44. United Baptist Church, Kuhuboto
45. Youth Department, UBC, Kuhuboto
46. Mothers' Association, Khekiho Colony
47. Cultural Committee, Khekiho Colony
48. Republican Party of India (Athawale)
49. M/s. MW Enterprises
50. Ao Milen
51. CIHSR, Dimapur
52. United Riders' Motorcycle Club, Nagaland.

Ozüibo nenok nem kecha meyipa magütsütettsü, ajisüaka nenok temeim mapa tajung asoshi Tsüingremi nenok ajak moajangma ta onoki sarasademtsür.

- Temeim Aya, Adi aser Kinungertem.



October 12, 2023 nü Marrakech, Morocco nung Union Finance Minister, Nirmala Sitharaman aser Morocco Minister of Finance, Budget & Banking Sector, Mze Abdou Mohamed Chanfiou na senden amentsü lia tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, MONGPUTENI (OCTOBER) 13, 2023

Dimapur nung kiburtem

Dimapur agi district asem aküm nungji tangbo Dimapur ya tanga yimti nung kiyong ka shia masü kanga tilaka dang kümogo, anungji kiburi temulung agütsüra anepalutsü kanga melamelar. Aji oda, government-i kecha magütsüyonga yimti tipdema topur junga ayutsü asoshibo Dimapur nung alirtemi sarutepa inyak nunga kanga topur junga kümdaktsütsü koka lir. Ajisüaka, item ajakji kibur dak dang aket. Aji oda, kidang kilir aika aliyonga kiburi mapa alem meshira aser kiburi anir pei kibong, pei kiyong aser pei yimti meima anepalua mesayura kilirtem jagi kilong kima merüktetsü melen tejana-ang janatsü. Ibaji mesüka Dimapur yimti nunga kibur ali mali memetet mapang talangka aruogo. Ajisüaka, timtem aremer maremtet aser Dimapur janaba ngur tangar dang akba agi ola madok melitet tang lokti tentetemi Dimapur ajungtsü atema ola adoker südi . Iba yimobilem nung taoba mapang lemsatepba ama Dimapur yabo Naga kin mejeteta kin ka indang masü aser tamalen nungi arua alir tsümartem rongnunga kin ka meyong masü, yabo Naga nungger inti mong aser Dimapur nung alir senso ajak meyong, anungji ajak kibur. Ajisüaka, kiburtem madaka kiburtemjibo Naga Council-i anir Dimapur nung lokti tentetemi asütsü. Aji oda, Dimapur nung lokti tentet tentetba ya Dimapur ajungtsü atema tentetbatem lir, anungji Naga Council-i anir lokti tilatiba tashi agi Dimapur ajungtsü atema mapa tilakabosa inyaktsüla. Iba amajika Dimapur nung kibur küma pei shisatsü, nübo aser rongsen agi Dimapur asoshi meinyakra, Dimapur ya tangar telok ana meyong akümtsü. Item telok anaji ka bendang lima nungi ayangi arurtem aser ano telok kaji meshimetsürtem asütsü. Atangji, asen lima aser asen yimti madak kibur akümba yimyaji talir temang dang alimelen sarutsüba masü saka aseni anir asen yimti ajungtsü atema tenla agütsütsü aser government nung alir MLA-tem nungi shir office ajak nung kima aser kilong aokertem tashi ajungshia pei tata shilem shitak inyakdaksütsü. Aji oda, government-i inyaktsüba ser nung mapa kar nung nemzünemkua yutsüba reprangtetra ola adoktsü aser nungdakra longka aita mepelaba sayutsü. Item ajakji pei lima aser pei yimti asoshi kiburtemi kibur mapa meteta inyakba mapatem asütsü. Aji oda, pi dang danga taaktsüka Dimapur yimti tiyong lenmang dena majungba, azüklen lenmang temdanga nisungrtem tetsüng agi jajatsü yangluba apu tilaka merenemtet kümsülusü ajokshiba, state stadium yanglu tenzükdang asortem joko kibong küma chirnur arur saka stadium merenemteter, Forest colony nung kechi kiang memetetka yangluba tang tashi melapoktetter, Clock tower ka alinung yangji clock mali, police point ajak süjen naidaka ayudak amai angur, aonung arura yimti memesük street light mali tammang, anungdang light yindong aser yinzü den süngzü tapu aika mesangshiba agi tokolak menütsüka, Dimapur Govt College atsübo renem-merenemka chirep, government libo ajak atsüngseper melega aolena mali ki asü, meshimetsür agibo yimti tasüng, kar auso amer meshimetsür aser kar linük tenüng amer meshimetsür, ano meshimetsürtem dang nungibo yi jemer aser mozü achirtemang teimba. Item timtem ajakji Dimapur nung aliba kiburtemi Nagaland DGP dang shiogo. Ajisüaka, ibaji DGP-ba kija mapa masü saka kiburtemi anir yimti nung aliba arogo aser lokti tentetemi inyaktsüba shilemang tuluba lir. Atangji, Dimapur nung lokti tentetemi Dimapur nungbo yi odia yokdaksütsüla ta ashiba angashiogo, ajisüaka yi odia ayokba agi dangbo asenoki tanü Dimapur nung ajuruba tamakok aser timtem ya makoktsü. Dimapur ajungtsü atema yi majemtsüla, drugs dang masü senotsüa machitsüla aser nisung shiai kibur kümküma pei tata mapa shitak inyaktsüla aser senso shiai pei temertena meteta ola adoktsüla.

OLEMSABANG

RISHIKANGSHI SAKA PONGMEN MAKET

~ Süpingnüngsang Longkümer
Darogapathar Dimapur

Ni angazükba agi Dr clarck nunggerji shingaia memerenshi kechaser parnok Molungkimongi atule lule ta senzüdang parnok kümzüksü atema yimsüsürtemi nisung 40 tashi shimtetta Dr clarck nungger meina jajadaktsüba otsü dak alaka tepsetba aser akira agi asüba-a mangashi mesüra memetet. 1876-78 tashi nung yim tulu kar sema senzüba Nokeinketter mongjen kaket nung angur. Dr clarck o Jongshinokdang jamir Ungma yimlang kusaa sanger pusu samen, chuchu yonglang nung ajurutepbaji 1877 September nung alitsü Südi ta Yimsüsür samenba nükjitung jagi angatetter aser tena Ungma nung ajurutepbaji 1878 January, Feb meta alitsü südi kechaser iba mapangji kisü jensü mapang liasü. samenba jagi Dr ba pelasetta akizüker külen tena sensahsem dang, Na-a amangnür mamangnür ta asüdangtang nibo mamangli ta langzü, süra yimtaklirtem amangdaksütsü mamangdaksütsü ta Dr bai ano asüngdangtang samenbai shinga menokdangtsü ta langzü nung süra tamangertemji kiyong palaka mesüra yimsen ka razüka aotsü melatsü memelatsü ta Dr bai asütang Samenbai ashi, nai apenba yimsü tajung yagi nüpur ajak amangsepdang künu kena kimong ali ka, talen ka anungji amangogoer ta bei chir aser adianu kinunger mepilatsü ta langzütep. Dr ba tebilembaji tamangertemji ano mongin masü anungji külemi lira atsüngzüka oalir ta tebilemba liasü ta südi ta angatetter. Yamaji Ao kin tang masü Moya tzüin aser mere sangtem ajak metangdange (tanen mekae) küm noklang ka majongtang Naga lima amangsepdaktsü. Ibai rishikangshi maliba yong tesüngmangtsü otsü tulu lir ya shir ajanga ? molungkimong nungi razüka maotang Tsüngrem milem tsükloktsüba ajanga lir; Tsürabor kibong nung ali tashi par otsü nung dena lir, saka techir kowe südir saka kibong razüka orbo bei kibong otsü tenzüker, aser iba anogoji tasuba anogo asütsü. Tasuba anogo benjongji kodang bilemtetdir benjong tulua akitsü akok saka anogoji ajisa asütsü. Tsürabor kanga akhüm tsüpuangma Anungji asatangertemji nisung rongnung lenjiter sünung nüngsen tsüpua asü mesüra mangatet züklem ka nung yutsüba agi shidakba otsü raksatsür tanü mangattetepsa akümer anungji shinga tettsüpue Tsüngrem tsüputi. Otsü tajung aika aser temenungratsüka angashiogo saka asenok tasuba anogo asoshi jembir. Kechi shidakba lir aji kechiba nenoki bei sasa angatettepba makümer Luk 12 : 57. Tsüngremi arogo ana perong kanga moajangma.

. Tsüngrem chir khristapo tasunü nungi nashe ki nung okrongseta asu saka tatitang aser rishikangshi aser tatala jendi arema nütsüng terana arogodena (Aika rongnungi Tsüngremi mulungba shimtetta) anir Yisui shiranger, nükboker, tsüngtsüker, yiar, aser tasür shia arudaktsür külen nütsüng terana tesamaba Israel kidong Santem dangi tang yokba tetezü pa Israel kidong dangi aruba ta jangjatsür ama angatetter. Math 10 : 6 nung alibaji Jer 50 : 6 jagi jangjatsür. Item nütsüngtem mejetta par kibong nung tenzükertem. Aser ano tanga mapang ka nung Kibubai tangar nütsüng neter ana shimtetta sayutsüngi yokba .Luk 10 : 1-12 angur. Tangar nütsüngtem jagia terana denji kasa mapa inyakba angur. Item ajak yagi arogo nung tenzüksü shimertem ajak nungjapo palala saka samapa tanülatem bushir teloksa ta sayur. Künü anügo nisungtem meyi pongu sentepba yur chiyongtsü maka joko anü talur lia nütsüngtem nem chiyongtsü pushidaksü nung amtsük pongu aser ango ana ngua yisui moatsür nütsüngtemi lema agütsü. Parnok chir-a molok terana anungba Mth 14 : 13- 20. Yirusalemi takok ngua aiba mapang Gado anir arutsü nütsüng ana yok. Yisui temeshi tanüla mapa angatetdaksü inyak, aser nütsüngtemi tenyaba mapa inyak Mth 21:1-3 Nütsüngtem den kümtetsü benjong achi dang benjongji kong renamdaktsünür ta Yisu dang asüngdang. Mth 26 : 17 parnok inyakba tem ya Yisui tanüla mapa ren inyak aser nütüngtemi alima mapa ren aser temeshi tanüla ren ajak inyakdaksü. Yisui sen nung mekongshe, sen amshitsü Iskariot shibai Yisu ashioksü pai tang amshiba sayur. Yamaji inyakaka Pa sensaja rishikangshia kangki nung tepsetaka pai tai memena pongmen maket inyaktet. Tsüngrem temenenji, Pa mangyangba dang tashi taitba hosea 11 : 9 Kü tesashi ain adokba ni meinyak, Effraim samatsütsü ni memeyiptsü; kechiyong Ni Tsüngrem, nisung masü. Yisu ket nung DDO ajak pa ajanga, saka pai sen ali rongsen nung mekongshi. Yisui koma inyak yamaji Sannükertem Pa dak ajizüka inyakdaksütsü Pai sayur. DDO ar ta sen aser rongsen ajak nung Sannükertem dang Sen aser rongsen ajak nai amshiang ta lokdi ashi nunga ma ta langzüksüba. Iskariot ama sen memeimdaktsütsü asen kibubai sayur. Tetsür indi telok, Lanur telok, Tila tanur aser Sunday school item telok ajak atema tanishirtemi küm nung kowepen sen nungdaker yamaji teloki mongdang nung lemsütsüba ama Sannükertem-i anir bei telok ataba ama amshidaktsütsü lokdi-i renema ayur. Ajioda mesüra ketdangsurtemji mayu tajungba Iba ama dang BCM inyakyim ta ajar. Anungji bei kibong razüka okaji tsürapori lenmang sayutsü akok saka kibong telong tashi teka mamoshi tajungba., techirtem kibonga raksaja lirko kümtangang tim mesüra lokdi-i merenshitsü tashe lir. Kaket rüju tesayurtemi zülua aliba zünger sayurji kanga junga sayutsü akok saka arogo yapo tanüla mapa anungji Tsüngremi nangri kangtsüba tenzüker asüyongbo arogo telongi aita meinyakra mangajemtsü. Iba ocet ajak ya mongdang aser arogo dak petpeta lir ta amanger Tsüngremi moajangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tribal nungi mezüngbuba Cardinal, Toppo asüpila sentong agiogo



October 11, 2023 nü Jharkhand state yimtiba, Ranchi nung Asia nung tribal rongnungi mezüngbuba Cardinal, Telesphore Placidus Toppo asüpila sentong nung tangokba noksa nung angur.

October 12, 2023: Asia nung tribal nungi mezüngbuba Cardinal, Telesphore Placidus Toppo asüpila sentong October 11 nü agiogo; iba sentong nung Khristan 30,000 shi aden.

Arrshi küm 84, Toppo October 4, 2023 nü Jharkhand state nung Arogoi lapokba Father Constant Leavens Hospital & Research Centre nung treatment tagidak mapang asü.

Asüpila sentong nungji Khristan 30,000 shi den Jharkhand Angh, C. P. Radhakrishnan aser Chief Minister Hemant Soren na densema nisung ajak senteper 50,000 shi aden, ta Indian bishops' office for tribal affairs secretary, Nicholas Barla-i metetdaksü.

October 12 nü osangbener den jembidang Barla-i, "Kin balala aser tamangba yimsü balala amangertem aikati pa nem akhüm agütsütsü atema lokti tulu adenshibaji ajanga pa ya nüburtem atema cardinal

liasü ta kuli sayur," ta metetdaksü.

"Toppo ya 'nüburtem cardinal' ta züngshi, kechiyong pai tribal nüburtem yaritsü atema teblemtsü balala atema nendaka inyak. Pa mapang talangka bilemtetsü," ta pai ashi.

Asüpila sentongji state yimtiba, Ranchi nung Archbishop, Felix Toppo leniba nung agi. Kasa sentong nung bishop 27, putir 500 aser nun meyrjang aika dena liasü.

October 10 nü tasümgangji hospital nungi Ranchi-i bener aoba sülen asür nem akhüm agütsütsü atema nüburtem nem temelaba agüja liasü.

Toppo ya Indian tribal nungi mezüngbuba College of Cardinals of Holy See nung züngsem liasü. 2005 küm Pope Benedict aser 2013 küm Pope Francis shimba conclave ana nung pa denogo.

1984 küm pa Ranchi nung Archbishop aküm aser 2018 küm pa anisüngzükba küm tashi

archbishop inyak. Toppo-i Sadri, Oraon, Hindi, English aser Italian oshitem junga jembiteta liasü.

"Cardinal (Toppo)-i nisungtem tanela nung aintsü atema nendaka inyakba den külemi shisaliok aser tanga lenla ajak nung liromedema aintsü atema inyaka liasü," ta Barla-i ashi.

Jharkhand sorkar nung taoba mapang tribal advisory committee nung züngsem, Ratan Tirkey-i, "Toppo ta tebuti ka ama liasü aser nisung ajaki pa dang 'Baba' [Oba] ta aja. Yimsü balala tsüngda sensaksemtsü atema pai ajungmeso aser yimsü balala amanger ajak longjema alitsü atema inter-religious forum tentet," ta metetdaksü.

Khristan lenir kati, "Cardinal-i yimsü balala amangertem tsüngda ongdang samatsüba dang masü saka yimsü balala amangertem ajak külemi tesünep nung alitsü atema pai inyaka liasü," ta metetdaksü.

Korea nunger Khristantemi tasüba temerenshi agientsü akhanger

October 12, 2023: October 10, 2023 nü 'World Day Against the Death Penalty' anogomong nung South Korea nung Catholic, Protestant aser tanga Khristan telok balala nungi züngsemtemi linük nung tasüba temerenshi agientsü takhangba agütsüogo.

United Conference on the Abolition of Death Penalty forum nung Khristan denomination balala nungi züngsemtem aser meimchir temeden atema inyaktertem densema lir.

Parnoki yimsüsürtem dang meimchir taküm akhümstübuba temaitsü tasüba temerenshi agientsüla, ta takhangba agütsü.

United Conference on the Abolition of Death Penalty-i sangdong ka ajanga, "Nisung sangdong ka ajanga, "Nisung

aser Korea nung tasüba temerenshi agientsü atema maneni takhangba agütsütsüla," ta metetdaksü.

1997 küm nungi tang tashi nung South Korea ketdangsertemi shinga nem-a tasüba temerenshi magütsü, ibayongji Amnesty International-ibo South Korea ya tasüba temerenshi agienba linüktem rongnung züngoker.

Ajisüaka South Korea nunger Judicial system nung tang tashi tasüba temerenshi densema lir. Tang linük nung tasüba temerenshi obendang agüja alir nisung 59 lir; parnok ajak ya nisung tepsetba ken o nung aija alirtem lir.

Forum-isa, "Sorkari tasüba temerenshi magütsütsü ta ashir, ajisüaka osangkakettem nungbo tasüba temerenshi agütsüba facilities aliba osangtem sangdonger,

ibayongji onoki teblemtsü akar. Iba denji külemi tasüba temerenshi obendang agüja alirtem Seoul Detention Center (jail)-i anir aoba ajanga-a iba temaitsüji sayur," ta metetdaksü.

Tawa Korean Ministry of Justice-i tepuokdak alir ana Seoul Detention Center-i anir oa liasü. Tamalen tasüba temerenshi ajak iba jail nung dang agüja liasü.

South Korea human rights commission-ia, linük nung tasüba temerenshi agientsüla, kechiyong alima nung linüktem teimbakati iba temerenshi agienadokogo, ta metetdaksü.

October 10 nü National Human Rights Commission of Korea-i sangdong ka ajanga, linük 144-i tasüba temerenshi agienogo aser linük 55 nung ang tasüba temerenshi magien, ta metetdaksü.

ANOGO ABEN TSÜNGREM DEN

Tabensa Nükjidong - T.Ken 138: 1-8

"Kibubai kü sentong renemtsütsü, Ne yimlibilem, o Kibuba, teti alir, Ne ket agi amtakba mapa nai mechioktsü" (t.8). Asenok nisung shia taküm asoshi Tsüngrem sentong ka lir. Shidakba nung, pai asen kotak nung khujang ajak züngtetta lir (matt. 10:30). Tanü Tsüngrem asen nungdak meteta lir. Pai asenok asoshi bilemstür, pa teka mapa asenok lir.

Tsüngremi asenok asoshi bilemba kodang abensadaksür? Pai kodang asen taküm nung mapa inyaksü yimlar? Mezüngbuba, kodang asenoki Pa tenüng sangdir. Tekong 1 nung ashir, "Kü mulung ajak agi ni ne nem tenüngsang agütsütsü. Tsüngremtem madak ni ne nüngsang atentsü". Tekong 2 nung azünger, "Ni Ne temeshi tenla ki tsütsü külemtsü. Aser ne temeim yimlibilem aser ne atangji asoshi ni ne tenüng nung tenüngsang agütsütsü". Kodang asenoki Tsüngrem külemba aser tenüng asangba nung mapang agidir, pai asenok asoshi bilemba abensadaksür. Saka asenoki asen lemanng nung ora, asenoki Tsüngrem nungi temoatsü samar.

Kodang asenoki sarasademer Tsüngremi asenok atema bilemba abensadaksür. "Ni na ajaba anogo nung nai kü dang langzü, Nai kü nela nung tashi agüja ajungshi"(t.3). Iba yagi Tsüngremi tema tiaji melenshitsür ta mashir. Pai ken zülur telunglen melenshitsü. Kodang asenoki Kibuba külemdir aser pa dang ayimtendir, pai asenok tenüng nung mapa inyaksü akok.

Tatamsa, kodang asenoki pa sentsüwangshidir pai asenok atema bilemba abensadaksür. "Alima chuba ajaki ne nem tenüngsang agütsütsü, O Kibuba kechiyong parnoki ne bang nungi o angashiogo. Au, parnoki Kibuba lemanngtem indang ken atentsü. Kechiyong Kibuba sentsüwangshi tulu lir"(t.4,5). Tangar dang Tsüngrem tenüng asangbaji asenok sensaksemba yimya shilem ka asütsüla.

Alima nung Tsüngremi ne kija taküm asoshi mapa inyaksü jangrar. Kodang nai pa dang sarasademba ajanga, pa sentsüwangshiba ajanga, pa asoshi kuli asüba ajanga aser pa nem bendanga agütsüba ajanga, pa kulemdir, Pai ne tenüng nung mapa inyaksü. Tanü nai tasen kümshiba temoatsü nungdakra, pa dangi meyipang. Pai agütsütsü.

Kaduna State nung Khristan 30 puer ao

Abuja (Nigeria), October 12 (Agencies): October 7, 2023 nü Nigeria kübok Kaduna State nung kiralongrartemi Khristan 30 puer ogo, ta osang ka ajanga metetdaksü.

Anüngdang 11:00 ako meta Chikum County kübok Chikuri yimyak Khristantem alu inyakba mapang nung anüngdang 11:00 ako meta kiralongrartemi parnok amakba sülen puer ao, ta iba tesem nungji alir, Victor Dabo-i metetdaksü.

Osangbener den jembidang Dabo-i, "Khristan 30 dak tema alu inyakba mapang nung kiralongrartem arua parnok ajak puer ao. Chikuri yimyak Khristantem atema sarasademjang," ta mepishia metetdaksü.

Kasa yimyak alir, Dogara Peter-i, "Kiralongrartemi puer aoertem rongnungji kütsü aser kü aianu nata densema lir. Iba tatalokba ajanga yimyaklirtem

kanga ratamatar," ta metetdaksü.

Paisa police, security agencies aser Nigeria sorkar dang puer aoertemji kümzükgang, ta mepishi.

"Onoki iba temepishiba agütsür, kechiyong kiralongrartemi parnok chiochtsü atema onok dang sen akhang nunga onok ket nung sen mali. Tamalen tatalokba ana nunga nisung puer aoba sülen kiralongrartemi parnok chiochtsü atema sen khangzüka liasü," ta Peter-i ashi.

Open Doors' 2023 World Watch List (WWL) report ajanga, "Fulani telok, Boko Haram, Islamic State West Africa Province (ISWAP) kiralongrartem aser tangartemi Khristantem tepseter, tashiyim amshia raksatsür, nisung puer aoba sülen sen akhanger mesüra shi nung medemtsü atema alar ama ayur," ta metetdaksüogo.

AO OSHI ANGAZÜKDAK:
TANÜ ANGAZÜKTSÜBA OJANG



Sangtomata

(adv) anepalu maket inyakba (sloppy)

* Sangtomata nisungi mapa inyak dang osettsüset kanga raksar.

Sangtosangra

(n) totzü nung asangba chiyongtsü tapu balala (fried food)

* Temang atema sangtosangra chiyongtsü kangabo machitsüla.

OLONG PAITEP # 6665

	1	2		3	4	5
6					7	
				8	9	
		10				
11						
			12			
13	14		15			16
17						18

TIPIEN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprängzük - (4)
- 10. Tasola - (5)
- 11. S _ _ _ _ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. _ _ _ hi - (3)
- 16. Akümüli nungi pilar - (3)

OLONG PAITEP # 6664 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

Happy Birthday

TENÜNG : ORANEN LONGCHAR (CHUCHUYIMLANG)

Tasoba anogo : 13th Oct. 2020.

Talidak : Medziphema Town.

Masadangtetba aser Mezüngdangtetba Tsüngremer Taochi agi Jala küm asem renteta aniba asoshi asen Tsüngrem Tenüng tali asanger. Maneni la nem arishi talang moajangma ta sarasademtsür.

- Temeim Oba, Oja & Oya.



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Tepela Tasoba Anogo



Manipur nung temesepba mozü shibelener 4 apu



Manipur nung temesepba mozü shibelener 4 rongnung parnok asem noksa nung angur.

Imphal, Mongputeni/ October 12 (Agencies):

Narcotics and Affairs of Border (NAB) police aser Assam Rifles na senteper taoba ghonda 24 tsüngda tesem balala meita aoba mapang World is Your (WY) tablets seret 46 aser heroin talep 45 puogo, ta ketdangsur source kati Brehostibarnü metetdaksü.

Osang tejangja ka angazükba sülen NAB police station nungi team kati Bolero gari ka sot aser temesepba mozü shibelener asem ket nungi heroin gram 581 pua liasü. Panok asem ya Bodhbarnü

nikongtsütsü Imphal East district kübok Maphou Dam lenmang nung Napet Pali, forest office anasa pua liasü.

Parnok asem ket nungi ano mobile phone asem aser tashishitsü aketba kuli kaket kar pua liasü.

Temesepba mozü ya soap case 45 nung seper jang juli ana nung inoker lia ngutetogo.

Aija alirtem ya Senapati kübok Thangjingpokpi yimtsüng nungi Phulmun Kashung (37), Kasom Khullen kübok Kangshum yimtsüng nungi CT Jackson, Ukhrul kübok Kangkhum yimtsüng nungi

Ningshen Joy (40) ta jangjaogo. Parnok asem anema ken o ka benokogo aser maneni bushisüngdangdar.

Tanga tatalokba ka nung 20 Assam Rifles personal temi Imphal-Moreh lenmang nung Khudengthabi tesem nungi sen crore 20 alang WY tablets puogo.

Tenokdangba agütsür aliba temesepba mozütem ya Moreh len nungi Mahindra Bolero ka nung bener arua lia apu.

Sepaitemi pua alisang ya Tengenoupal district kübok Lamkang Khunou nung alir J Alanson Lamkang (36) ta jangjaogo.

CM Himanta amokmerena Kamrup nung poster kar maloktsü

Guwahati, Mongpiteni/ October 12 (Agencies):

Mejangjaba nisungtemi Chief Minister Himanta Biswa Sarma amokmerena Assam nung Kamrup kübok Aggyathuri tesem nung postertem maloktsü.

Postertem ya shirnoki maloktsü iba indang osang tejangja memetet, ajisüaka Dadara Police iba tesemi oa poster tem agizükogo aser bushisüngdang tenzükogo.

Assamese oshi nung zülur aliba poster tem nung, "Himanta Biswa Sarma nü inyakyim ya Assam asoshi majung aser iba amala inyakyim ya tangsa tang

anentsü nüngdaker, ajita mesüra onoki na poksatsütsü," ta zülur liasü.

Poster nungsa Assamese oshi nung "Bhemse" ta ser lokti tentet aser kijar mejangjai tenüng ka zülur liasü.

Poster mataka aliba tesem ya Guwahati kübok Jalukbari tesem nungi km 10 shi pilar lir, koba Hajo constituency küboki aitsü.

Delimitation masü tsüngda iba tesem ya Jalukbari constituency nung shilem ka liasü, koba Chief Minister Himanta Biswa Sarma indang constituency lir.

Police-i ken o bushisüngdang

tenzükogo aser local tem dang nungi osang tejangjaba agitsü merangdar.

Poster nungsa nisung asem indang noksa inoker liasü saka shingia parnok asem ya mejangja.

Local kati ashiba agi, iba poster ya shibai matak mesüra kodang matak shingia memetet saka iba tesem nung poster pezü pongu ka madaker liasü.

Nisung kari asayamenüa iba poster maloktsü asütsü akok, ajisüaka iba amokmeren ya pongba pongba magitsü kechiyong iba ya Chief Minister amokmerenba lir.

Imphal nung UNLF züngsem asem apu

Imphal, Mongputeni/ October 12 (Agencies):

Taoba ghonda 24 meita aoba sentong ayongzüka agiba mapang United National Liberation Front, (UNLF) züngsem asem Imphal West District nung atsükoker lia puogo. Parnok asem ya nüburtem rakzükkrademba nung densema liasü.

Parnok asem ket nungi pistol ka den injang 8 keter magazine ka, mobile phone 7 aser registration number maliba gypsy ka puogo, ta police sangdong ka ajanga Brehostibarnü metetdaksü.

Sepaitemi apuba

telungpurtem aser parnok ket nungi ngutetba prangbong injang aser gari ya ken o dak sendaka aliba police station nem bendanga agütsüogo.

Telungpurtem apuba sülen security force aser Manipur Police na senteper Kakching, Bishnupur, Churachandpur, aser Thoubal districts nung lendong keta aliba tesemtem meita oa liasü.

Meita aoba mapang prangbong ana aser Indian-made Hand Grenade ka Kakching District nung nguteta liasü, ta osang ajanga metetdaksü.

NH-37 nung gari 343 aser

NH-2 nung gari 195 kecha tetsükdaksü makai senzüsenpongdaksüogo. Item garitem nung tenüngdakba osettem bener liasü.

Lendong ataloktsü ana nung aliba tesemtem nung security akangshioogo aser garitem kecha tetsükdaksü makai senzüsenpongtsü atema security convoy ka agütsüogo.

Manipur kübok tesem balala nung nakas/checkpoints 132 amenoka lir aser police temi state kübok district balala nung ozüng alema inyaksangshir nisung 1641 pua lir, ta osang ajangsa metetdaksü.

Pua alir mechiok tashi electric switch kata melapoktsü: Israel

Tel Aviv, Mongputeni/Oct. 12 (Agencies): Hamas teloki pua alir mechiok tashi Gaza-i tongtipang osettsüset mesüra humanitarian aid meyoxtsü, ta Israel indang energy minister-i ashi.

"Gaza dangi humanitarian aid? Israel nung pua alirtem kidangi meyipa meshilang tashi electric switch kata melapoktsü, tzü pipe kata melapoktsü aser totzü abenba gari kata meyoxtsü," ta Israel Katz-i Brehostibarnü ashi.

Honibarnü Hamas telungpuri Israel amakdang Israel nung, bendanger aser senso ana-na alir nisung aika apu südi ta amanger.

Hamas telungpuri Israel nung nisung 97 pua bener aoba Israel mitkar temi jangjateta lir.

Bodhbar aonung Hamas indang armed wing, al-Qassam Brigades ajanga video ka sayaba nung tetsür ka aser tanur ana chiokba amai angu. Saka ibai par telok chichiba ayak nembangtsü mechi yangluba ka dang lir ta Israel-i ashir.

Honibarnü amakba tayang kepzüka Israel-i Hamas samatsütsü nangzükogo aser Gaza Strip nung tashi ajak amshia amaktsü sangdong. Honibarnep züngia lia nungi Hamas-i anüing, ali aser tzüyim nungi Israel amakdang nisung 1,300 dak tema süogo aser nisung 3,000 shi yiru, ta Israel-i ashir.

Tesem ajaklen lungbanga aliba Gaza nung Israel-i tayimtsü amshia amakdang nisung 1,200 dak tema tepset aser 5,000 dak tema yiru, ta Palestine ketdangsür temi ashir.

Gaza nung electric power

station ka dang aliba shibangogo aser mozüki tem nung totzü tagimar.

"Iba rara ajanga meimchir asoshi reshikangshi ya tepang agi ashitsü makok, aser ni telok anaprong dang civilian tem timtemdaksüba ajemtsü ajungshir," ta International Committee of the Red Cross regional director Fabrizio Carboni-i Brehostibarnü ashi.

"Gaza nung power maka, mozüki nung power maka, kinü tanur incubators nung alirtem aser teitet rogotem oxygen inoka alirtem lendong nung lir. Kidney dialysis anener aser x-rays magiteter. Electricity malibo mozüki tem tasüming ayuba tesem akumtsü."

Gaza nung ano alilen nungi amaktsü asoshi renemshia Israeli reservists meyrirjang aika jaogo.

Tang tashi amaktsü telemtetbabo agia mali saka onok iba atema renemshir, ta Israel mitkar indang odongtar Lieutenant-Colonel Richard Hecht-i Brehostibarnü ashi.

Palestine nung telungpurtem tang tashi tzüyim ajanga Israel-i aittsü meranger aser mitkar temi maneni Gaza süngkum mükabanga ayutsü meranger, ta Hecht-i osangbener dang ashi.

Ato Kilonser Benjamin Netanyahu aser opposition lenir Benny Gantz nati 'unity government' ka kumtetsü Bodhbarnü molungtepa liasü.

"Tang ama mapang asenok ajak Israel indang sepai lir. Ibai yimtenren tsütsü lungjemba masü saka tia kasa aliba ajanga lir," ta Gantz-i ashi.

Washington ya Israel den dena lir ta temaitsü sayutsü aser

rara tuluba mekumdaksütsü meranga aser pua alirtem chiokdaksütsü mechi US Secretary of State Antony Blinken Brehostibarnü Israel tongogo.

Israel-i Gaza amakdang Palestine nung asüba 1,354 jungogo aser nisung 6,049 yirur lir, ta Palestinian health ministry ajanga Brehostibarnü ashi.

Occupied West Bank nung arua alir Israel nungeri Palestine nung ana tepset, ta parnoki ashi.

Bodhbarnü Qusra yimtsüing nung Israel sepaitem aser armed settlers temi tepsetba Palestine nung pezü den asüpila sentong agidang injang khaloktsü aser iba mapang tebo aser jabaso asü, ta ashi.

Tel Aviv nung osangbener senden ka nung jembidang, "Hamas ya ISIS lir aser ISIS samatsüba ama Hamas ya samatsütsü," ta Israel Ato Kilonser Netanyahu-i ashi.

"ISIS amshiba den kasa Hamas ya amshitsüla. Parnok linük balala nungi aridoktsüla. Lenir shingia parnok majurutsüla, linük katia parnok meyaritsüla, aser yamaji inyaker nem temerenshi/tenokdangba agütsütsüla," ta pai ashi.

"Civilian dak mokongshitsüsa mera agitsü kanga tongtipang lir aser iba yongji asenoki nisung asüba atema mang ayimer. Honibarnü amakdang Hamas-i US senso 25 tepsetogo," ta US Secretary of State, Antony Blinken-ia ashi.

Israel asoshi US mitkar teyari tali arutar. Teyari tali agütsütsü asoshi Congress nung party telemsa makai molunger, ta pai ashi.

Russia Tir Putin-i Kyrgyzstan semdang

Bishkek, Mongputeni/Oct. 12 (Agencies): Rara mapang mapa tamajung inyakba nung tai ronglokja International Criminal Court (ICC) ajanga aputsü totuyuba agütsüba sülen tang mezüngbuba bendang lima semdanga Russia Tir Vladimir Putin-i Kyrgyzstan tonga aruogo.

Putin-i ananü atema Bishkek semdangba ya Commonwealth of Independent States (CIS) nung dena tembangtsü, koba taoba Soviet republics linüktem agi kumtetba intergovernmental organisation lir.

2022 kum tetenzüklen Ukraine linüki sepaitem yokba sülen Putin ya Russia yutsür bendang limai kangabo maor aser pa ano Beijing nung asembuba Belt and Road Forum nung adentsü asoshi taruba hopta China-i aotsü imlar.

Brehostibarnü Kyrgyz Tir Sadyr Japarov den senden ka amendang shishilembapa tsütsü Russia ya tongtipang lir aser

Kyrgyzstan nung senotsü timba indoker linük lir ta nenshia ashi aser linük ana ya maneni tesendaktep yangertsüla, ta shia liasü.

"Tiri jaokba asoshi pelaba lemsateper. Asenok yangi ajuruteptsü asoshi kuli tajung lir, saka kuli meliaka mapang talangka nungi bilema aliba tang semdangteter," ta Putin-i ashi.

R u s s i a - K y r g y z shishilempaba nunga kanga junga ainba indang Russia leniri ashi.

Taoba hopta Kyrgyzstan central bank ajanga local bank tem dang anüolen linük temi Moscow nem temerenshi/tenokdangba agüja aliba sülen tajungba nung anidaksü asoshi azüoktsü ajungshia liasü.

Kyrgyz company pezü-i Russia dang electronic components aser danga technology tanaben ayokba mechi July ita United States-i item company nem tenokdangba/temerenshi agüja

liasü.

Kyrgyzstan nung Putin ya Kant jila anasa Russia indang airbase lapoker kum 20 ajungba sentong nung shilem agitsü imlar. Iba tesem nung tayimtsü anendak tesem amenokba ajanga region nung Moscow tashi uludaksür.

Ukraine nung tanur meyrirjang aika Russia-i yok ta tai tonglokja March ita ICC ajanga Putin aser Russia indang rights commissioner Maria Lvova-Belova aputsü totuyuba agüja liasü.

Russia-i ICC tashi magizüker aser aputsü totuyuba agütsüba ya ozüing alema lir ta aitsür.

Kyrgyzstan aser China ya ICC züngsem masü, anungji parnok iba talenba küboki maiter.

Ajisüaka bendang lima semdangba mapang Russia kanga saksalema arur aser August ita BRICS senden nung Putin melen Foreign Minister Sergey Lavrov ang yok.

Office of the
Kohima Longjanglar Telongjem
Kohima, Nagaland

TENÜNGSANG AGÜTSÜR

Kohima Longjanglar Telongjem ajanga Wb. Meyasashi Longkümer asür Wb. Yashimeren aser asür Wt. Mapulila na jabaso-i Department of Horticulture, Govt of Nagaland nung Director jenjang ngutetba asoshi pa nem konang nüngsang aser tetushi tulu agütsür.

Asen Teyanglur Tsüngremi pa taküm aser wadang maneni moajangma.



Sd/-
Lipokmenla Imsong
Tir, KLT

Sd/-
Temsumongla Jamir
Tezülula, KLT



AROK KHU SOCIETY

(GRACE REHABILITATION HOME)

Registered under societies registration act 1860

Aitlenden Ward, Tuli Town - 798618

Dist. Mokokchung : Nagaland.

PRESS RELEASE

Arok Khu Society Managing Board aser Tuli Town Ward Union, Adhoc Town Committee Tzudikong aser Village Council Chairman, Secretary Aopenzu aser Loyung Village külem mensem ka 27th September 2023 nung Tuli Lenden Baptist Church Guest House nung mena liasü.

Iba mensem nung Grgace Rehabilitation Home tajungtiba nung inyaka aotsü lenmang bushitsü aser nungdakba ajak peria ayutsü jemi.

Iba mensem nung kecha telok (NGO) mesüra kejai iba tenüing Grace Rehabilitation Home jaloka kecha nungdak mesüra mapa Tuli area telongtet nung amshia inyaktsü makok / memelatsü.

Iba Grace Rehabilitation Home yagi Chairman den junga masüngdangtepi lokti, mesüra kija shinga ayitsü memelar.

Sd/-
Mr. Shilukokba
Chairman
Arok Khu Society

Sd/-
Mr. Bendangmongba
Secretary
Arok Khu Society

US-i Ukraine mitkar nem sen million \$200 alang teyari agütsütsü sangdong

Brussels, Mongputeni/Oct. 12 (Agencies): United States-i Ukraine nem air defence aser rocket ammunition densema sen million \$200 alang teyari tasen agütsütsü.

Brussels nung aliba NATO headquarters nung Kyiv bhukumer linüktem ananü senden Bodhbarnü tenzükdang US Defense Secretary Lloyd Austin-i iba teyari agütsütsü ya sangdonga liasü.

Sorkar meshibangdaksütsü mechi ita tetenzüklen Congress nung bill ka nungi Kyiv nem teyari agütsütsü aliba agienba sülen iba teyari ya mezüngbuba alitsü.

Republican temi anema nokdakba mapang iba teyari magütsütsü telemtetba agiba ajanga Ukraine-i Russian sepaitem den raraba nung Washington-i maneni yaritsü nangzükba nung tasüngdangba arur.

Kobika südir süaka Ukraine den külemi US nokdaksü ta Austin-i Bodhbarnüa nenshia ashi.

Congress nungi temelaba meliaka US Tir Joe Biden indang administration-i military stocks nungi sen billion \$5 dak tema hadir agizütsü tashi lir.

Ajisüaka Department of Defense ajanga tenla agüja aliba hadir aser osettsüset melentsü asoshi sen billion \$1.6 dang anüing lir.

Austin aser Air Force General Charles Q Brown nati

Kyiv densema tembar linüktem dang Israel-i Hamas den raraba nung yariyonga maneni Ukraine yaritetsü ta iba senden nung angatetdaksütsü merangtsü.

Russia-i amak tenzüker tang tashinung US-i Ukraine nem sen billion \$44 alang mitkar nem teyari agüja lir, aser item rongnung tanks, rockets aser injang round million aika dena lir.

Tembar linüktem dang asüka metenzükdang nok-nü tashi meshitsü mechi Ukraine Tir Volodymyr Zelenskyy-a iba senden nung adener.

"Onok renemshir, onok renema lir. Tang onoki lenirtem nungi teyari kar nungdaker," ta Zelenskyy-i defence minister tem senden amentsü lia ashi.

Russia Tir Vladimir Putin-i ano maneni asüka ya raratsü asoshi hadir ka ama amshia Ukraine nung energy infrastructure nung tenük yoktsü meranger, ta NATO Secretary-General Jens Stoltenberg-i ashi.

"Asenoki ibaji nokdangtsüla. Air defence atema hadir tajungba aser timba ajanga asenoki tepila tulu adokdaksütetsü," ta Stoltenberg-i ashi.

July ita nungi tenzüka Ukraine-i par linük south aser east tsütsü litsü tanaben agitsü meranga rara arur, saka Russia nungeri landmines rema aliba aser sashi-sashia nokdakba rakpoka moteter.

MDFA Trophy Oct 17 nungi tenzüksü, telok 14-i shilem agitsü



MDFA Trophy 2023 atema fixture draw asüba sentong agidang MDFA ketdangsürtem den shilem agitsü aliba telok balala nungi meyongertem külemi tangokba noksa nung angur. Mokokchung, 12th October, 2023.

Mokokchung, Mongputeni/October 12 (TYO): Taküm 2023 MDFA Trophy nung telok 14-i shilem agitsü asoshi tenung agitsüogo. Iba asayamung ya Oct 17 nungi tenzüksü Imkongmeren Sports Complex, Mokokchung nung asayatsü sentong renema lir.

Mokokchung District Football Association (MDFA) asoshi otsü tasen ka küma taküm küm yabo iba asayamung ya Nagaland nung aliba tejangrar telok ajaki shilem agitetsüsa sabang lapoktsü, aji saka, tanga district nungi telok katia tenung agüja mali. Aji oda süaka, Nagaland tesem balala nungi asayar tajung aika arua club balala meyonga asayatsü ta osang ajanga angazüker.

Iba asayamung atema Oct 12 nü MDFA Kimen kidang 'fixture draw' asüba sentong agiogo. Pool 'A' nung, Moanungsang Memorial Sporting Club, Dare Devils Assam Rifles aser Brotherhood F/C par asem alitsü. Pool 'B' nung, Arka F/C, Telongjem F/C, XVI United Brothers aser N.U Lumami ta par pezü alitsü. Pool 'C' nung, Legendary Yeomanly Misfit, Zonipang S/A, Konyak Students' Union Mokokchung aser Sports Society Soyim (SSS) lir aser Pool 'D' nung, Super Seniors, KSR Team aser Lomuden F/C alitsü. Taküm shilem agirtem ya Telongjem FC-i kümnabuba MDFA Trophy atonga bena lir

aser taküm küm parnoki benra, kümsem atonga abener telok rongnung densemstü. Tang tashi nung MDFA Trophy kümsem atonga abenerji telok ana dang lir. Arkong Sporting Club-i 1996, 1997 aser 1998, aser Snipers FC-i 2001, 2002 & 2003 ta bena lir.

Fixture draw asüba sentong tongmelang ka agidang, MDFA Trophy tenzüksü taküm ya balaka mezüngbuba open tournament ka asayar asünung, nüburtemi teimla tulu nung atatar, anungji, telok ajaki yimya tajungtiba aser tazüokba nung asayatsü asoshi MDFA ketdangsürtemisa ajungshia liasü. MDFA ketdangsürtemisa asayamung dak sentakba nungdak balala metetdaksü.

Wayne Rooney-i Birmingham coach mapa agizükogo



Mongputeni/October 12, 2023 (Agencies): Taoba mapang Manchester United nungi asayar Wayne Rooney Birmingham Championship club Birmingham indang head coach kümogo.

Major League Soccer club DC United taoba hopta toktsüba sülen Rooney-i St Andrew's nung John Eustace melenogo aser club den küm ana atema tenangzüktepba yangluogo.

Eustace ya Birmingham nung ita 15 inyakba sülen mapang nungi anentsüogo aser Premier League-i promote asütsü atema club anitsü asoshi Rooney dak nungi imla alitsü.

Birmingham pur Championship nung tang jenjang trokbuba nung lir.

"Ni Birmingham City nung tang ama jangrademtsü mapang ka nung adenba atema pelar. Parnok sentong ka lir ta tejangja aser club nükjidong atongtsü atema bendanga agütsür lir," ta Rooney-i ashi.

"Club-i kechi imlar iba dak sendakba nung onok ajak tebilemdangba kasa dang lir. Ni iba maongka asoshi renema atatsü asoshi kü indang managerial career yanglua aruogo aser mapa tenzüksü matateter," ta pai ashi.

Rooney den Birmingham

nung taoba England team-mate aser tang England Under-21 assistant coach Ashley Cole aser Republic of Ireland assistant coach John O'Shea nung densema lir.

Carl Robinson aser Pete Shuttleworth na Rooney den DC United nung külemi inyakogo aser tenata Birmingham city nung denogo.

"Wayne ya takoker ka lir aser pa indang coaching staff, club aser onok pusemertem teyari nung pai Blues pur tejakdangi anitsü imlar," ta Birmingham co-owner Tom Wagner-i ashi.

Rooney-i taoba mapang 2020 November nungi 2022 küm June ita tashi Championship nung Derby club coach mapa inyakogo.

Pa asaya aliba mapang mezüng Everton nungi asaya tenzüksü aser 2004 küm United nung dena liasü.

Pa ya United nung goal timtiba idaktsüba asayar aküm aser iba club nungi Premier League title pongu tashi bena liasü. Paisa Champions League, Europa League, FA Cup aser League Cups asem kokogo.

Filippo Inzaghi Salernitana coach kümogo

Mongputeni/October 12, 2023 (Agencies): Taoba mapang Italy nung international asayar Filippo Inzaghi, Serie A club Salernitana-i parnok head coach mapa bendaktsütsü atema mongolbarnü shimogo.

Salernitana-i coach Paulo Sousa mapa nungi anenja pa melena Inzaghi shimba sangdongogo. Inzaghi ya Inter Milan coach Simone Inzaghi teti lir.

Salernitana pur Deobarnü goal 3-0 agi Monza-i kokogo, koba asaya asembuba atonga goal ka danga midaktsü tamakok anguba liasü. Parnoki tang tashi nung asaya ti nung draw asem süa point asem ngua lir aser parnok ponglang nungi tanabuba nung lir.

Coach mapa agizükba sülen Salernitana pur pa lenisüba nung mezüngbuba asaya Cagliari den asayatsü.

Arishi küm 50 tain Inzaghi ya Reggina toktsüba sülen club kecha dena sendaktepa maliasü. Reggina pur ya rongsenketzung nung timtem aliba ajanga Seria B nungi tugudaktsüba sülen pai club toktsü. Pa lenisüba nung Reggina pur taoba season



Filippo Inzaghi

promotion playoffs tonga asaya liasü.

Inzaghi-i tatemsa Seria A nung 2020-21 season nung Benevento coach mapa inyaka liasü, ajisüiaka parnok relegate süatok.

Inzaghi mezüngbuba 2014 küm AC Milan coach mapa inyaka coaching nung pa career tenzüksü, saka pa season tembangba sülen mapang nungi anentsü. Paisa, Venezia, Bologna aser Brescia coach mapa inyakogo.

Inzaghi asaya aliba mapang Milan nungi küm 11 asayaogo aser iba mapang Seria A anaben aser Champions League ana kokogo. Pa ya 2006 küm Italy team-i World Cup akokba team nung züngoksema liasü.

NSF Trophy: Red Scars final-i iogo



Dimapur, Mongputeni/October 12 (TYO): Tang asaya aliba 23buba NSF Marty's Memorial Trophy nung Bresthostibarnü Red Scars Football club-i United FC Piphema Red goal 3-1 agi koka final-i iogo.

Iba asayamung ya Angami Students Union-i ayongzüksü Indira Gandhi Stadium nung asayadar.

Asaya nung Yhunshalo Kemp-i Red Scars atema mezüngbuba goal minute 14buba nung idaktsü ajisüiaka asaya mezüngbuba shilem atemtsü lia Piphema atema Kekerusezo Kimho-i goal ka

idakja goal kasasa aküm.

Goal kaka nung asaya tanabuba shilem tenzüksüba sülen Ghuphe Chishi-i Red Scars atema minute 65buba nung tanabuba goal idaktsü aser iba sülen mapang apuloktsür asayaba mapang Asito Krose-i par team atema tasembuba goal idakja parnok asaya akok.

Asaya nung match patron Manipur MLA L. Dikho-i Red Scars nungi asayar Vikethozo nem man of the match naroküm agüja liasü.

October 14 nü final asaya Liangmai FC aser Red Scars FC na nikongtsütsü 5 ako nungi tenzüksü asayatsü.

BILEMDANGANG

"Sobaliba samara maitsü samatsü."